

Namołwa němskich biskopow k swjatkownej akciji Renovabis 2019

Lube sotry a lubi bratřa we wěrje!

Dlěje hač 25 lět zasadźuje so akcija Renovabis za solidarnosť a partnerstwo z ludźimi srjedźneje a wuchodneje Europy. Wjele dobreho je so w tymle času wuskutkować hodźało. Zdobom pak so pokazuje, zo njesu hłuboko sahace scěhi lětdžesatki trajaceho komunistiskeho knjejstwa hišće přewinjene. Naša solidarnosť wostanje potajkim dale prašana.

Mnozy ludžo srjedźneje a wuchodneje Europy widža jeničce mało šansow za swój přichod. Najwšelakoriše kubłanske naprawy přinošuja k tomu, zo swoje žiwjenje aktiwnje wuhotuja a zo zamóža swoju towaršnosť k pozitiwnemu změnić. Wuknjenje pomha, swój horicont rozšěrić a swoju wutrobu za něšto nowe wotewrić – nic jenož w šuli, ale čas žiwjenja.

Tohodla su projekty pomocneho skutka Renovabis na kubłanskim polu tak wažne. Tute započnu so hižo w spěchowanju pěstowarnjow. Čezišća su dalewuwiće katolskeho šulstwa a polěpšenje móžnosćow powołanskeho wukubłanja a dalekubłanja. Runje tak podpěra Renovabis katechetiske kaž tež cyrkwinske młodžinske džěto a kubłanje dorosćenych. Tohodla rěka lětuše hesło swjatkowneje akcije „Wuknyć je žiwjenje. Podpěrajće kubłanske džěto we wuchodnej Europje!“.

My biskopja prosymy was wutrobnje: Podpěrajće tute wažne naležnosće pomocneho skutka Renovabis ze swojim paćerjom a swojim wulkomyslnym darom do kolekty swjatkownu njedźelu!

Lingen, 14. měrca 2019

Za Drježdžansko-Mišnjanske biskopstwo
+ Heinrich Timmerevers
Drježdžansko-Mišnjanski biskop